

NORŪ TAXRE GA POPERA GA CORĪTIUCŪĀX GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxē ga yema yaxōgŭxŭ ga Corĭtiuwa yexmagŭxŭ

¹ Pa Chaueneēgŭ i Corĭtiucŭāxgŭ i Tupanaāxŭ yaxōgŭxŭ, rü Pa Chaueneēgŭ i Guxŭma i Acayaanewa Ngēxmagŭxŭ, choma i Pauru nixĭ i pexcèx chanaxŭmatŭxŭ i ñaã popera wŭxigu namaã i taeneē i Timutéu. Rü choma nixĭ i Tupana choxŭ yaxuxŭ na Ngechuchu ya Cristu choxŭ muxŭ na nüxŭ chixuxŭcèx i norü ore.

² Rü tanaxwèxe na Tanatŭ ya Tupana rü tórü Cori ya Ngechuchu ya Cristu pexna nanaxã i norü ngechaxŭ rü norü taãèxŭ.

Pauru rü ngúxŭ ninge

³ Rü toma rü nüxŭ tikuèxŭŭgŭ ya Tupana ya Nanatŭ ya tórü Cori ya Ngechuchu ya Cristu. Erü nŭma nixĭ ya Tanatŭ ya nüxŭ ingechaŭtŭmŭŭgŭcŭ rü tórü Tupana ya guxŭguma tŭxŭ taãèxèècŭ.

⁴ Rü nŭma ya Tupana rü toxŭ nataãèxèè i ngēxguma ngúxŭ tingexgu, na toma rü ta tanataãèxèègŭxŭcèx i ngēma togŭ i duŭxŭgŭ i ngúxŭ ingegŭxŭ. Rü ngēmaãcŭ ngēma Tupana toxŭ na taãèxèèxŭrŭŭ toma rü ta tanataãèxèègŭ i ngēma togŭ i duŭxŭgŭ.

5 Rū ñuxma na Cristurüŭ poraãcü ngúxŭ tingegüxŭ, rü ngëxgumarüŭ nümatama poraãcü toxŭ nataãëxë.

6 Rü ngëmacèx, ngëxguma toma ngúxŭ tingegügu, rü ngëmaãcü toxŭ nangupetü na pema rü pexŭ nangëxmaxŭcèx i perü taãë rü perü maxŭ i taguma gúxŭ. Rü ngëxguma Tupana toxŭ taãëxëëgu, rü ngëmaãcü tomaã nanaxü na pema rü ta pexŭ nangëxmaxŭcèx i perü taãë rü yaxna namaã pexinüëxŭcèx i ngëxguma ngëmatama ngúxŭ i toma tingegüxŭ pexŭ ngëxmagu.

7 Toma rü aixcüma tayaxõgü na pema rü tagutáma ípenatáxŭ i Tupanaãrü ore. Erü nüxŭ tacuèx rü ngëma na toxrüŭ ngúxŭ pingegüxŭ, rü ngëxgumarüŭ tá ta toxrüŭ pexŭ nangëxma i ngëma taãë i Tupanawa ne üxŭ.

8 Pa Chaueneëgüx, tanaxwèxe i nüxŭ pecuèx na ñuxre ga guxchaxŭgü toxŭ ngupetüxŭ ga Áchiaanewa. Rü yema na poraãcü toxŭ naguxchaxŭ, rü düxwa marü tama namaã taporae, rü nagu tarüxñnüë na marü täütáma tamaxëxŭ.

9 Rü nagu tarüxñnüë rü ñoma yuwa taxixŭrüŭ tixŭgü. Natürü yemaãcü toxŭ naxüpetü, erü Tupana ya yuexŭxŭ írüdagüxëëcü toxŭ nangüexëëchaŭ na nüxŭicatama nüxŭ nangëxmaxŭ i pora na yuwa toxŭ ínanguxŭxëëxŭcèx, rü taxucürüwama togütama na ítanguxŭxëëxŭ.

10 Rü Tupana rü toxŭ ínanguxŭxëë nawa ga yema guxchaxŭ ga yuwa toxŭ gagüchaŭxŭ. Rü ngëxgumarüŭ tá ta toxŭ ínanguxŭxëë nawa i ñaã taxŭ i guxchaxŭ i ñuxma toxŭ ngëxmaxŭ. Rü aixcüma tayaxõgü na nüma rü guxŭgutáma

ngēmaācū toxū nangūxēēxū.

¹¹ Natürü tanaxwēxe i pema rü perü yumüxēmaā toxū perüngūxēē. Rü ngēxguma chi ngēmaācū penaxūxgux, rü muxūma i duūxūgū rü tá Tupanana moxē naxāgū naxcèx i ngēma na ñuxācū toxū nangūxēēxū.

Tūxcüü tama Corītiuwa naxū ga Pauru

¹² Nangēxma i tacü i toxū taāxēēxū. Rü ngēma nixī na toōēwa nüxū tacuáxū na ñoma i naānewa rü aixcūma Tupana naxwēxexūācūma meā tamaxēxū. Rü pepēxewa nixī ga guxūārü yexera yemaācū tamaxēxū. Natürü tama togagu nixī ga yema, yerü Tupana ya tomaā mecūmacü nixī ga toxū rüngūxēēcü na yemaācū pepēxewa tamaxēxūcèx.

¹³⁻¹⁴ Rü yema poperagū ga pexcèx taxūmatūxūwa, rü nataxuma ga tacü ga icúxū. Natürü yema toma tamaxēxūācūma nixī ga pexcèx tanaxūmatūxū na yemawa meā nüxū pecuáxūcèx na ñuxācū tixīgūxū. Rü woo i ñuxma rü tama aixcūma meā toxū na pecuáxū, natürü chanaxwēxe i wūxi i ngunexūgu rü aixcūma meā toxū pecuèx. Rü ngēxguma meā toxū pecuèxgu rü pema rü tá tomaā petaāēgū i ngēxguma ínanguxgu ya tórü Cori ya Ngechuchu, rü ngēxgumarūū i toma rü tá ta pemaā tataāēgū.

¹⁵⁻¹⁶ Rü yemagu charūxīnūxūcèx nixī ga noxri ga pexūtawa na chaxūxchaūxū na pexū íchayadauxūcèx rü yemaācū pexū na charüngūxēēxūcèx. Rü nagu charūxīnū ga Machedóniāānewa chaxūxgu na pexūtagu íchidauxū, rü yexguma Machedóniāānewa ne chaxūxgu rü wenaxārü pexūtagu íchidauxū. Rü

yemaãcü chanaxüxchaŭ, yerü nagu charüxĩnü na yemawena choxü perüngüxẽẽxü na Yudéaanewa chaxüxücèx.

17 Bexmana pema nagu perüxĩnüëgu rü tama aixcüma chayanguxẽẽegaãcüma nagu charüxĩnü ga yema pexütawa na chaxüëgaxü. ¿Éxna pema nagu perüxĩnüëgu rü ñoma wüxi i duüxü i tama Tupanaãxü yaxõxürüüãcüma chamaxü, rü “Ngü” ñacharügüchiréx woo tama chayanguxẽẽëgagu i ngẽma nüxü chixuxü?

18 Natürü Tupana toxü nacuèx na aixcüma yĩxü i ngẽma torü ore ega pemaã itaxunetagu.

19 Erü yima Ngechuchu ya Cristu ya Tupana Nane ga guma Chiribánu rü Timutéu rü choma pemaã nüxü tixuchigacü, rü ore i aixcüma ixixüxüicatama nixu. Rü nüma rü aixcüma nayanguxẽẽ i ngẽma nüxü yaxuxü.

20 Rü Cristu nixi ya yima yanguxẽẽcü ga guxüma ga yema unetagü ga Tupana nuxcümaxüchi nüxü ixuxü. Rü ngẽmacèx ngẽxguma Ngechuchuégagu Tupanaxü icuèxüügügu, rü ñatarügügu:

“Rü aixcüma nixi i ngẽma”, ñatarügügu.

21 Rü ñuxma na Cristuarü duüxügü ixigüxü, rü Tupana nixi ya toxü poraexẽẽcü rü pexü poraexẽẽcü na taguma Cristuna ixigachixücèx. Rü nümatama nixi ga tüxü nadexü na noxrü ixigüxücèx.

22 Rü nüma ya Tupana rü naëga tagu naxü erü tórü yora nixi. Rü nüma rü tüxna nanamu i Naã i Üünexü na wüxi i tórü cuèxruü yixücèx, rü ngẽmawa nüxü icuáxücèx na yixcüra tá tüxna naxããxü i muxüma i to i mexügü.

²³ Pema nûxŭ pecuèx ga noxri rŭ Corŭtiuwa chaxŭxchaŭ, natŭrŭ tama yéma petanŭwa chaxŭ yerŭ tama chanaxwèxe na pexŭ changechaŭgŭxêèxŭ. Rŭ yemacèx tama pexŭtawa íchayadau, yerŭ tama pexŭ chingagŭchaŭ. Rŭ Tupana nûxŭ nacuèx na aixcŭma na yîxŭ ga yéma.

²⁴ Rŭ tama tanaxwèxe na pexŭ tamuxŭ na ñuxăcŭ tá Tupanaăxŭ peyaxôgŭxŭ. Erŭ pema rŭ marŭ aixcŭma meăma peyaxôgŭ. Natŭrŭ ngéma tanaxwèxexŭ nixŭ na pexŭ tarŭngŭxêègŭxŭ na yexeraăcŭ petaăegŭxŭcèx.

2

¹ Rŭ yemacèx nixŭ ga tama wena pexŭtawa chaxŭxŭ, yerŭ tama chanaxwèxe ga pexŭ na changechaŭxêèxŭ.

² Erŭ ngêxguma chi pexŭ changechaŭxêègu, ¿rŭ texé tá choxŭ tataăèxêè? ¿Rŭ ñuxăcŭ tá choxŭ petaăèxêè, ega pexŭ changechaŭxêègu?

³ Rŭ yemacèx nixŭ ga yemaăcŭ pexcèx popera chaxŭmatŭxŭ na penamexêègŭxŭcèx i perŭ guxchaxŭgŭ naxŭpa na pexŭtawa chaxŭxŭ. Yerŭ tama chanaxwèxe ga yexguma chi yéma chaxŭxgu na choxŭ pengechaŭxêèxŭ. Erŭ pema nixŭ i chanaxwèxexŭ na choxŭ petaăèxêègŭxŭ. Rŭ aixcŭma nagu charŭxŭnŭ rŭ ngêxguma choma chataăèxgu rŭ pema rŭ tá ta petaăègŭ.

⁴ Rŭ yexguma pexcèx chanaxŭmatŭgu ga yema popera, rŭ poraăcŭ chanaxŭxăchiăè, rŭ dŭxwa yema chorŭ ngechaŭmaă chaxaxu. Natŭrŭ tama pexcèx chanaxŭmatŭ na pexŭ changechaŭxêèxŭcèx, natŭrŭ pexcèx

chanaxūmatū na nūxū pecuáxūcèx na ñuxācū poraācū pexū changechaūxū.

Pauru rü nūxū nūxū nangechaū ga yema duūxū ga chixexū namaā üxū

⁵ Rū yema yatū ga choxū ngechaūxēēxū, rü tama choxūxīcatama nixī ga nangechaūxēēxū, natürü pexū rü ta nangechaūxēē. Natürü tama chanan-gupetūxēēchaxū na pexna chacaxū i ngemachiga..

⁶ Rū yema poxcu ga nūxna pexāxū ga yema duūxū ga yexguma pengutaquēxegūgu, rü chauxcèx rü marū name na ngēxīcatama na yūxū.

⁷ Rū ngēmacèx i ñuxma rü chanaxwèxe i nūxū nūxū pengechaū i norü chixexū rü nūxū perūngūxēē na tama yexeraxū i chixexūwa nagaāxūcèx i ngēma norü ngechaū.

⁸ Rū ngēmacèx chanaxwèxe i wenaxārū noxrirūū nūxū nūxū pedauxēē na aixcūma nūxū pengechaūxū.

⁹ Rū yemacèx nixī ga yemachiga marū pexcèx chanaxūmatūxū, yerü pexū chaxūxchaū, rü nūxū chacuáxchaū ngoxi marū aixcūma chauga pexīnūē.

¹⁰ Rū ñuxma pemaā nūxū chixu rü yixema pema tūxū nūxū pengechaūxē i tūmaārū chixexū, rü choma rü tá ta tūxū nūxū changechaū. Rū ngēxguma chi tacū rü chixexūxū tūxū changechaūgu, rü pegagu nixī i Cristupēxewa tūxū nūxū changechaūxū i ngēma.

¹¹ Rū ngēmaācū chanaxū na tama nayoxniēxūcèx i Chataná na chixexūgu tūxū nayixēēxūcèx. Erü yixema rü meāma nūxū tacuèx i nacūma i Chataná na ñuxācū chixexūgu tūxū nayixēēchaūxū.

Tróaarü ãñewa rü nanaxixãchiã ga Pauru

12 Rŭ yexguma Tróaarü ãñewa changuxgu na nŭxŭ chixuxçèx ga Cristuarü ore, rŭ poraãcŭ choxŭ natauxcha na yéma tórü Coriaxŭ chapuracŭxŭ.

13 Natürü tama aixcŭma chataãẽ ga yéma, yerü tama yexma nŭxŭ chayangau ga taeneẽ ga Titu. Rŭ yemacèx nŭxŭ charŭmoxẽ ga yémacŭãx ga duŭxŭgŭ, rŭ ichaxŭãchi, rŭ Machedóniãñewa chaxŭ.

Cristu rü Paurumaã napora

14 Rŭ Tupanana moxẽ taxãgŭ erü norü duŭxŭgŭxŭ toxŭ nixŭgŭxẽ. Rŭ ñuxma na Cristuarü duŭxŭgŭ tixŭgŭxŭ, rŭ nŭma ya Tupana rŭ guxŭguma tomaã nanaxŭpẽxe. Rŭ nŭma nixŭ i toxŭ namuxŭ na duŭxŭgŭxŭ nŭxŭ tacuèxẽxçèx i norü ore. Rŭ ngẽma norü ore rŭ guxŭwama nangu rŭ guxŭguma nipuema ñoma wŭxi i pumara i yixichixŭrŭŭ.

15 Rŭ ñuxma i toma i Cristugagu Tupanapẽxewa na timexŭ, rŭ guxŭwama tanguchigagŭ natanüwa i ngema yaxŭgŭxŭ rŭ ngema tama yaxŭgŭxŭ.

16 Rŭ ngẽma duŭxŭgŭ i tama yaxŭgŭxŭ rŭ nŭxŭ nawextŭmŭxŭ i tochiga, erü ngema ore i nŭxŭ tixuxŭ rŭ norü poxcuchigaxŭ namaã nixu. Natürü ngẽma yaxŭgŭxŭ rŭ namaã nataxẽgŭ i tochiga erü ngema ore i nŭxŭ tixuxŭ rŭ ore i namaxẽxẽxŭ nixŭ. Rŭ ngẽmacèx çtexãxŭ natauxcha i ñaã puracŭ na nŭxŭ tixuxŭ i ngẽma ore?

17 Rŭ yixema toxrŭŭ ixŭgŭxexicatama tixŭ ya tŭxŭ natauxchaxe. Rŭ toma rŭ tama Tupanaärü oregu dŭeru ngŭxŭ tayaxu ngẽma togŭ naxŭgŭxŭrŭŭ.

Natürü Tupanapēxewa rü aixcūma meã nüxŭ tixu i ngēma norü ore, erü nüma toxŭ nimugü rü Cristu-arü tixĩgü.

3

Tupanaãrü uneta i ngexwacaxŭxŭchiga

¹ Rü ñuxma na pemaã nüxŭ tixuxŭ na aixcūma Tupana yĩxŭ ga toxŭ mucü, rü bexmana tá nagu perüxĩnŭē na wenaxãrü togüētüwa tidexagŭxŭ. Ĵēxna penaxwèxe na wüxi i carta i cuèxruŭ pexŭ tawéxŭ na nawa nüxŭ pecuáxŭcèx na aixcūma Tupanaãrü orearü uruŭgü tixĩgŭxŭ, rü ēxna penaxwèxe na pexŭtawa naxcèx ítaçaxŭ i cartagü na ngēmawa duŭxŭgü toxŭ cuáxŭcèx naxrŭxŭ i ngema togü?

² Rü pemaã nüxŭ tixu rü tama tanaxwèxe i ñacü rü carta na duŭxŭgü toxŭ cuáxŭcèx, erü pematama nixĩ i ngēma cartarüŭ pixĩgŭxŭ, rü pewa nixĩ i nangóxŭ na aixcūma Tupana yĩxŭ ga toxŭ mucü. Rü meãma toõēwa nüxŭ tacuèx i ngēma. Rü yema na naxŭchicŭxŭ ga perü maxŭ, rü ngēmawa guxŭma i duŭxŭgü nüxŭ nadau na aixcūma wüxi ga mexŭ ga puracü taxŭxŭ ga petanüwa.

³ Rü ñuxma rü meãma nangox na pema rü ñoma wüxi i carta i Cristutama ümatŭxŭrŭŭ na pixĩgŭxŭ. Rü torü puracŭgagu nixĩ i ngēma. Natürü tama wüxi i carta i ñacü rü ümatŭxŭmaã ümatŭxŭ pixĩgŭ, natürü pema nixĩ i carta i Tupana ya Maxŭcŭãē i Üünexŭ ümatŭxŭ. Rü ngēma carta rü tama popera rü ēxna nutawa iwŭcuchixŭ nixĩ, natürü perü maxŭwa nixĩ i nangóxŭ i ngēma.

4 Rū ngēmacèx tama tamuūē na ngēmaācū togücèxtama tidexagūxū, erū tayaxōgū na Cristugagu Tupana toxū dauxū na timexū.

5 Rū tama toxrūtama cuèxmaā nixī i tanaxūxū i tacū rū mexū. Natürū guxūma i ngēma taxūxū rū Tupanaārū ngūxēēmaā nixī i tanaxūxū.

6 Rū Tupana rū toxū narüngūxēē na duūxūgūmaā nūxū tixuxū i ngēma ngexwacaxūxū i norū uneta na ñuxācū Cristugagu tá tūxna naxāāxū i maxū i taguma gūxū. Rū ngēma maxū rū tama yema mugū ga Moīché ūmatūxūgagu tanayaxu, natürū tanayaxu erū Tupanaāē i Üünexū tūxna nanaxā. Rū yema mugū ga Moīché ūmatūxū rū yuwa tūxū nagagū, natürū Tupanaāē i Üünexū rū tūxna nanaxā i maxū i taguma gūxū.

7 Rū yema mugū ga Moīchéna naxāxū ga Tupana, rū nutagu nixī ga naxūmatūxū. Rū yexguma Moīché nayauxgu ga yema mugū, rū poraācū niyaurachiwecūxū. Rū yemacèx ga duūxūgū rū taxucürūwama Moīchéchiwegu narūdaunū. Natürū yema norū yaurachiwecūū rū nixochigū. Natürū ga yema mugū ga Moīché tūxna āxū i yuwa tūxū gagūxū, rū taxū ga yauracūūxūmaā ínangu. Rū yemaācū namexēchi ga yexguma ínanguxgu.

8 Natürū yexeraācū namexēchi nixī i ngēma uneta i ngexwacaxūxū i Tupanaāē i Üünexū taxcèx ngoxēēxū.

9 Rū yemaācū woo namexēchi ga yema mugū ga yuwa tūxū gagūxū, natürū yexeraācū namexēchi i ngēma uneta i ngexwacaxūxū i Tupanapēxewa tūxū mexēēxū.

10 Rū yema mugū ga noxri mexēchixū, rū ñuxma rū taxuwama name, ega namaā nūgū nangugūgu

i ngēma Tupanaārū uneta i ngexwacaxūxū i yexeraācū mexēchixū.

¹¹ Rū yemaācū woo namexēchi ga yema mugū ga paxaāchi ixīxū, natürü yexeraācū namexēchi i ngēma uneta i ngexwacaxūxū i guxūgutáma ixīxū.

¹² Rū toma aixcūma nūxū tacuèx na guxūgutáma yīxū i ngēma Tupanaārū uneta i ngexwacaxūxū i mexēchixū, rü ngēmacèx tama cúācūma duūxūgūmaā nūxū tixu.

¹³ Rū ngēmacèx tama duūxūgūchaxwa iticuxgū yema Moiché üxürüü. Yerü ga Moiché rü nügü nidüxchiwe na tama nūxū nadaugūxūcèx ga yema Yudíugū ga ñuxācū na yaxochigūxū ga norü yaurachiwecūü.

¹⁴ Natürü ga yema duūxūgū ga Moichéxū íxümücügūxū rü ñoma yadūxgūchiwexürüü nixīgū yerü tama nūxū nacuèxgüéga ga tacūchiga na yīxū ga yema mugū. Rū ñuxma rü ta i ngēma Yudíugū rü tama nūxū nacuèxgüéga i ngēxguma nawa nangúegu i ngēma mugū. Erü nangēxma i tacū i ñoma yadūxgūchiwexürüü nūxū naguxchaxēēxū na tama nūxū nacuèxgūxūcèx. Rū ñuxma rü ta tama nūxna ínanguéga i ngēma nacūma erü Cristuxicatama nixī ya yima nūxna ínanguxēēcū.

¹⁵ Rū ñuxma rü ta i ngēma Yudíugū, rü ngēxguma nawa nangúegu i ngēma ore ga Moiché tūxna āxū, rü nangēxma i tacū i ñoma yadūxgūchiwexürüü nūxū naguxchaxēēxū na tama nūxū nacuèxgüégaxūcèx na tacūchiga yīxū i ngēma ore.

¹⁶ Natürü ngēxguma wūxi i duūxū nūxū rüxoxgu i nacūma i chixexū, rü tórü Coriaxū yaxōōgu, rü ngēxguma nixī i nūxna ínanguxū i ngēma nūxū

naguxchaxêẽxũ.

¹⁷ Erũ nũma ya tórũ Cori rũ Naãe i Üünexũ rũ wũxitama nixĩ rũ ngextá Ínangêxmaxũwa i tórũ Coriãe i Üünexũ, rũ tũxũ nanatauxchaxêẽ na Tupanana ingaicamagũxũ.

¹⁸ Rũ ngêmacèx guxãma i yixema na Cristuaxũ yaxôgũxũ rũ ñoma wũxi i woruarũũ tawa nangóchipeta na ñuxãcü namexêchixũ ya tórũ Cori erũ nataxuma i tacũ i tũxũ idũxũxũ naxchaxwa. Rũ nũma ya tórũ Cori i Naãe i Üünexũ ixĩcü, rũ guxũguma yexeraãcü tũxũ nimexêẽchigũ na naxrũũ aixcüma imexũcèx.

4

¹ Rũ ngêmacèx taguma nũxũ tarũchau i ñaã puracũ, erũ Tupana ya nũxũ tangechaũtũmũcũ nixĩ ga toxũ mucũ na tanaxũxũcèx i ñaã puracũ na duũxũgũmaã nũxũ tixuxũcèx i norũ ore.

² Rũ yemacèx nũxũ tarũxoe ga guxũma ga tacũ ga chixexũ i ãne tũxna ãxũ i cúãcü üxũ. Rũ tama tanawomũxêẽãcüma nixĩ i namaã nũxũ tixuxũ i ore rũ tama tanaxũchicũũ i ngêma ore. Natürũ ngêma ore i aixcüma ixĩxũxĩcatama nixĩ i nũxũ tixuxũ. Rũ ngêmaãcü Tupanapêxewa tamaxê rũ duũxũgũpêxewa togũ itawêx na nũxũ nacuèxgũxũcèx na ñuxãcü tixĩgũxũ i tomax.

³ Rũ ngêxguma chi texécèx naguxchagu i ngêma ore i mexũ i nũxũ tixuxũ, rũ ngêma duũxũgũ i iyarũtauxexũcèxicatama nixĩ i naguxchaxũ.

⁴ Erũ nũmagũ rũ tama nayaxôgũ. Rũ ngêmacèx i ñoma i naãneãrũ ãêxgacũ i Chataná rũ nũxũ nanaguxchaxêẽ na tama nũxũ nacuèxgũxũcèx na ñuxãcü namexêchixũ i norũ ore ya Cristu ya

Üü necü. Rü Cristuwa nixĩ i nangóxũ na ñuxãcü na yĩxũ ya Tupana.

⁵ Rü ngêxguma duũxũgümaã nüxũ tixuxgu i ngêma ore, rü tama tohigaxũtama tixugü. Natürü nüxũ tixu na Ngechuchu ya Cristu rü tórü Cori yĩxũ, rü nüma tüxũ na nangechaũxügagu perü ngũxêeruügu na tixĩgüxũ.

⁶ Erü nümatama ya Tupana ga noxri naãne naxũxgux rü eãnexũwa nangoxêecü ga ngóonexũ, rü nümatama nixĩ i ñuxma i tüxũ yangoxnaãxêegüxũ na ngêmawa nüxũ icuáxũcèx na ñuxãcü namexêchixũ i nümax. Rü ngêma norü mexũ rü Ngechuchu ya Cristuchiwewa nixĩ i nüxũ idauxũ.

Tayaxõgüama ega woo ngúxũ ingegügu

⁷ Rü ngêma nüxũ na icuáxũ na ñuxãcü namexêchixũ ya Tupana, rü ngêma cuèx rü wüxi i mexêchixũ nixĩ. Natürü ngêma cuèx i mexêchixũ rü taxüne i maĩraxũnaxcèxwa nangêxma, na nangóxũcèx na Tupanawa ne naxũxũ i guxũma i pora rü tama i tawatama.

⁸ Rü guxũwama toxũ nangêxma i guxchaxũgü, natürü taguma nüxũ tarüchau i ñaã puracü. Rü woo poraãcü taxoegaãegügu, natürü taguma ítanangêx.

⁹ Rü woo togü towe ingêxũtanügu, natürü ya Tupana rü taguma toxũ ínawogü. Rü woo duũxũgü toxũ napíexêegu, natürü tama ngêxma tayacuèxêe i ñaã puracü.

¹⁰ Rü guxũwama i ngextá ítaxĩxũwa rü aũcũmaxũwa tangêxmagü, yexgumarüũ ga Ngechuchu na aũcũmaxũwa nayexmaxũrüü.

Natürü ngēmaācū toxū naxūpetū na duūxūgū nūxū daugūxūcèx na ñuxācū towa namaxūxū ya Ngechuchu.

¹¹ Rū ñuxma na tamaxēxū, rū guxū i ngunexūgu rū Ngechuchugagu āñcūmaxūwa tangēxmagū. Natürü ngēmaācū toxū naxūpetū na Ngechuchu inawéxūcèx i norū pora nawa i ñaā toxone i yuxwèxexū.

¹² Rū ngēmaācū Tupanaārū orecèx āñcūmaxūwa tangēxmagū, natürü ngēmaācū toxū naxūpetū na pema rū pexū nangēxmaxūcèx i maxū i taguma gūxū.

¹³ Tupanaārū ore i ümatūxūwa rū ñanagürü: “Nūxū chayaxō rū yemacèx Tupanachiga chidexa”, ñanagürü. Rū ngēxgumarūūtama tixīgū i toma na tayaxōgūxū rū Tupanachiga tidexagūxū.

¹⁴ Erū nūxū tacuèxgū rū Tupana ga yuwa ínadxēēcū ga Ngechuchu ya tórū Cori, rū yimatama Tupana tá nixī ya toxū írūdagūxēēcū, erū Ngechuchuarū duūxūgū tixīgū. Rū ngēmaācū wūxigu pemaā nūgūxūtawa tá toxū nagagū.

¹⁵ Rū guxūma ga yema toxū ngupetūxū rū perū mexūcèx nixī na yexeraācū yamuētanūxūcèx i ngēma duūxūgū i Tupana nūxū rüngūxēēgūxū. Rū ngēmaācū tá dūxwa namuxūchi i ngēma duūxūgū i moxē Tupanana āgūxū rū nūxū icuèxūūgūxū.

¹⁶ Rū ngēmacèx taguma nūxū tarūxoe na nūxū tixuxū i ngēma ore. Rū woo yayachigūgu rū yaturachigūgu i toxone, natürü toōēwa rū guxū i ngunexūgu rū yexeraācū tiporaetanū.

¹⁷ Erū ngēma ngūxū i toxū üpetūxū i ñaā torū maxūwa, rū ngēma rū wūxi i paxaāchimare nixī rū

paxa tá nangupetü. Natürü ngēmaãcü tá tanayaxu i wüxi i maxü i mexēchixü i tagutáma gúxü i ñoma i naãnecüëx i maxüärü yexeraxüchi ixixü.

¹⁸ Rû tama ngēma ñuxma nüxü idauxügu nixĩ itarüxĩnüēxü, natürü nagu tarüxĩnüē i ngēma ñuxma tama nüxü idauxü. Erü ngēma ñuxma nüxü idauxü rû tama natai, natürü ngēma ñuxma tama nüxü idauxü, rû guxügutáma nangēxmaēcha.

5

¹ Rû nüxü tacuèxgü ega ngēxguma iyanaxoxgu i ñaã toxone i paxaãchi ñuxma toxü ngēxmaxü, rû daxüguxü i naãnewa tá tanayaxu i wüxi i toxone i tagutáma iyarüxoxü i Tupanatama toxcèx mexēxü rû tama i duüxügü.

² Rû ngēmacèx i ñuxma i ñaã toxonewa tamaxēyane, rû tama aixcüma tataãëgü. Erü tanaxwèxe na paxa toxü nangēxmaxü i ngēma toxone i daxüguxü i naãnewa ngēxmaxü.

³ Rû ngēma toxone i daxüguxü i naãnewa tá toxü ngēxmaxü rû ñoma wüxi i naxchirurüü tá toxü nidüxü, na ngēmaãcü naxãxñexücèx i toõë.

⁴ Rû ñaã toxone i ñuxma toxü ngēxmaxüwa tamaxēyane, rû tanaxixãchiãëgü rû tama aixcüma tataãëgü. Rû tama aixcüma ítanatáxchaü i toxone i ñoma i naãnewa toxü ngēxmaxü, natürü tanaxwèxegü na tanayaxuxü i toxone i ngexwacaxüxü na ngēmaãcü ngēma maxü i ngexwacaxüxü iyanaxoxēxücèx i toxone i ñuxma toxü ngēxmaxü.

⁵ Rû Tupana nixĩ ya toxü imexēëcü naxcèx i ngēma ngexwacaxüxü i maxü rû ngēma ngexwacaxüxü i toxone. Rû toxna nanamu ga Naã i

Ūünexŭ na ngēmawa nŭxŭ tacuáxŭcèx na aixcūma tá tanayaxuxŭ i ngēma.

⁶ Rŭ ngēmacèx taxucèxma taxoegaãēgŭ. Erŭ nŭxŭ tacuèx rŭ ñŭxma ñaã toxonewa tamaxēyane, rŭ taxucŭrŭwama tórŭ Corixŭtawa tangēxmagŭ i daxŭguxŭ i naãnewa.

⁷ Rŭ woo tama nŭxŭ tadaugŭgu ya yima tórŭ Cori i ñŭxmax, natŭrŭ tayaxōgŭ na wŭxi i ngunexŭ rŭ tá nŭxŭ tadaugŭxŭ. Rŭ ngēma nixŭ i toxŭ poraxēxŭ i ñaã torŭ maxŭwa.

⁸ Rŭ ngēmacèx taxucèxma taxoegaãēgŭ ega tayuegu. Erŭ toxcèx rŭ narŭmemaē nixŭ na nŭxna ítachoxŭxŭ i ñaã toxone, na tórŭ Corixŭtawa tayangēxmagŭxŭcèx.

⁹ Rŭ ngēmacèx, woo ñoma i toxonewa tangēxmagŭgu rŭ ēxna tama nawa tangēxmagŭgu, rŭ tanaxwèxe na guxŭguma tórŭ Coriarŭ ngŭchaŭ na taxŭxŭ. Rŭ ngēmacèx naxcèx tadaugŭ na tanaxŭxŭ i ngēma nanaxwèxexŭ i nŭmax.

¹⁰ Erŭ guxātama i yixema rŭ Cristupēxewa tá tangugŭ na wŭxichigŭ nayaxuxŭcèx i ngēma tŭxna ŭxŭ. Rŭ nŭma tá wŭxichigŭxŭ nangugŭarŭ maxŭāx. Rŭ ngēxgumarŭŭ na ñuxācŭ meã imaxēxŭ rŭ ēxna chixri imaxēxŭ ga yexguma ñoma ga taxŭnewa iyexmagŭgu, rŭ ngēmaācŭ tá tŭxna nanaxā ya wŭxichigŭ.

Cristu rŭ taxcèx Tupanaxŭ narŭngŭxmŭxēē

¹¹ Rŭ ngēmacèx Tupanaārŭ orearŭ uwa tapuracŭe rŭ tayaxucŭxēgŭ i duŭxŭgŭ na yaxōgŭāxŭcèx. Erŭ toma rŭ aixcūma torŭ Corixŭ tamuē. Rŭ Tupana toxŭ nacuèx na ñuxācŭ yīxŭ

i tórü maxŭ, rü chierüna pema rü chi ta toxŭ pecuèxgux.

12 Rŭ tama tanaxwèxe i wenaxārü togüétüwa tidexagü, natürü pexŭ tarüngŭxēēchaŭ na pexŭ nangēxmaxŭcèx na tacücèx tomaã petaãēgŭxŭ na nüxŭ pecuáxŭcèx na ñuxãcü penangãxŭxŭ i ngēma duŭxŭgü i pepèxewa nügü írümegünetaxŭ natürü norü maxŭwa rü tama ixaixcümagŭxŭ.

13 Rŭ woo duŭxŭgü toxŭ daugügu na Tupanagu taxããēgŭxŭ, rü nüetama nixŭ i ngēma erü nümatama ya Tupana rü meãma toxŭ nacuèx. Natürü i pema rü meãma toxŭ pecuèx na meãma toõxŭ tacuáãcüma pemaã nüxŭ tixuxŭ ga norü ore.

14 Rŭ Cristu ya poraãcü toxŭ ngechaŭcü nixŭ ya ñuxma tomaã icuácü, erü tayaxõ na nüma rü guxãärü pecaducèx nayuxŭ na yexma yanaxoxŭcèx ga guxãärü chixexŭgü.

15 Rŭ yemaãcü guxŭma ga duŭxŭgücèx nayu ga Cristu, na ngēma duŭxŭgü i ñuxma maxèxŭ, rü tama nümatama nagu naxŭñüèxŭgu namaxèxŭcèx, natürü naxcèx na namaxèxŭcèx ya yima naxcèx yucü rü wena írüdacü.

16 Rŭ ngēmacèx i toma rü tama ñoma i naãnecŭãx i duŭxŭgü nagu rüxŭñüèxŭrŭŭ texèxŭ tangugŭarü maxŭãx. Rŭ woo ga ũpa rü ñoma ga naãnecŭãx ga duŭxŭgü nagu rüxŭñüèxŭrŭŭ Cristuxŭ tangugü, natürü i ñuxma rü tama ngēmaãcü namaã nagu tarŭxŭñüè.

17 Rŭ ngèxguma texé Cristuaxŭ yaxõxgu, rü ngexwacaxŭxŭ i duŭxŭ tixŭ. Rŭ nuxcümäxŭ ga tümacüma rü marü tüxna inayarüxo, rü ngexwacaxŭxŭ i maxŭ tüxŭ nangèxma.

18 Rū guxūma i ngēma rū Tupana nixī ya naxücü. Rū nūma nixī ga Cristugagu tamaã inangüxmüxū. Rū ñuxma rū toxū namu na duūxügümaã nüxū tixuxū na namaã inangüxmüëxüçèx.

19 Yerü Tupana rū Cristugagu duūxügümaã nügü narüngüxmüxëë. Rū tama duūxügüarü pecadugu naxīnūãcüma nanaxü ga yema. Rū ñuxma rū toxū namu na ngēmachigaxū duūxügümaã tixuxū.

20 Rū ngēmaãcü Cristuarü orearü ngeruügü tixīgü, rū towa nixī i Tupana pexū cèèxūxū na namaã iperüngüxmüëxüçèx. Rū ngēmacèx Cristuégagu pexū tacèèxügü na Tupanamaã iperüngüxmüëxüçèx.

21 Cristu rū taguma pecadu naxü. Natürü tagagu nixī ga Tupana ga ñoma pecaduãxürüãcüma namaã naxüãxū na yemaãcü nagagu tüxū ínanguxüxëëxüçèx nawa i tórü chixexū na aixcüma napéxewa imexüçèx.

6

1 Rū ñuxma na Tupanaãrü ngüxëëruū tixīgüxū, rū pexū tacèèxū na tama nüxū pexoëxüçèx ga yema pemaã na namecümaxū ga yexguma nayuxgu ga Nane.

2 Erü Tupana rū norü ore i ümatüxūwa, rū ñanagürü:

“Rū yema ngunexū ga nagu namexügu na choxū peyaxuxū, rū yexguma nixī ga pexū chaxīnūxū. Rū yexguma pexna chanaxuãxūgu ga maxū i taguma gúxū, rū yexguma nixī ga pexū charüngüxëëxū”, ñanagürü. Rū ñuxma nixī i ngēma ngunexū i nagu namexū na Tupanaxū peyaxuxū, rū ñuxma nixī

i ngēma ngunexŭ i pexna naxuaxŭăxŭ i maxŭ i taguma gŭxŭ.

³ Rŭ toma rŭ guxŭguma naxcèx tadau na guxăpêxewa meă tamaxêxŭ na taxucèxma texé chixri torŭ puracŭchiga idexaxŭcèx.

⁴⁻⁵ Rŭ guxŭwama duŭxŭgŭxŭ nŭxŭ tadauxêêchaŭ na aixcŭma Tupanaârŭ duŭxŭgŭ tixŭgŭxŭ. Rŭ ngēmacèx yaxna namaă taxŭnŭē i ngēxguma woo ngŭxŭ toxŭ ngupetŭgu, rŭ êxna tacŭ toxŭ tauxgu, rŭ êxna tacŭ rŭ guxchaxŭ toxŭ ngēxmagu, rŭ êxna toxŭ yaçuaixgŭgu, rŭ êxna toxŭ napoxcuegu, rŭ êxna naxixăchiăetanŭgu rŭ tomaă nanuēgu. Rŭ poraăcŭxŭchima tapuracŭe, rŭ ņuxguacŭ rŭ tama tapee, rŭ ņuxguacŭ rŭ taiya toxŭ nangux. Natŭrŭ yaxna namaă taxŭnŭē i guxŭma i ngēma.

⁶ Rŭ ngexgumarŭxŭ ta duŭxŭgŭxŭ nŭxŭ tadauxêê na aixcŭma namexŭ i torŭ maxŭ, erŭ aixcŭma Tupanapêxewa meă tamaxê, rŭ meă Tupanaxŭ tacuèx, rŭ yaxna duŭxŭgŭmaă taxŭnŭē, rŭ namaă tamecŭma. Rŭ nŭxŭ nŭxŭ tadauxêê na towa nangêxmaxŭ i Tupanaăē i Ūŭnexŭ rŭ aixcŭma guxŭ i duŭxŭgŭxŭ tangechaŭxŭ.

⁷ Rŭ duŭxŭgŭxŭ nŭxŭ tadauxêê na aixcŭma namexŭ i torŭ maxŭ, erŭ namaă nŭxŭ tixu i ngēma ore i aixcŭma ixŭxŭ, rŭ itanawêx i Tupanaârŭ pora i towa ngêxmaxŭ. Rŭ ngēma toxne ixŭxŭ rŭ ngēma nixŭ i torŭ maxŭ i aixcŭma mexŭ i Tupanapêxewa. Rŭ ngēmamaă nixŭ i togŭ ítapoxŭxŭ i torŭ uwanŭgŭpêxewa.

⁸ Rŭ ņuxguacŭ i duŭxŭgŭ rŭ toxŭ nicuèxŭgŭ, rŭ ņuxguacŭ rŭ tacŭ tomaă nixugŭe. Rŭ ņuxguacŭ rŭ meă tochiga nidexagŭ, rŭ ņuxguacŭ rŭ chixri tochiga nidexagŭ. Rŭ woo aixcŭmachirêx yixŭgu

i ngēma ore i nūxū tixuxū, natürü doratèèx toxū nawogüe.

⁹ Rū woo meã toxū nacuèxgüchirēxgu, natürü ñoma tama toxū nacuáxürüü tomaã nixīgü i duūxügü. Rū ñuxguacü rü wixgutaèx tayue, natürü naetüwa tamaxēãma. Rū toxū napoxcue, natürü tama toxū nadaixichi.

¹⁰ Rū woo tangechaügügu, natürü guxüguma tataãëgüama. Rū woo ñoma i naãnewa tama tamuãrü ngēmaxūãxgügu, natürü muxüma i duūxüna tanaxã i taxü i mexü erü togagu nanayaxu i maxü i taguma gúxü. Rū woo taxuüma toxü ngēxmèxgu i ñoma i naãnewa, natürü daxü-guxü i naãnewa rü toxü nangēxma i guxüma.

¹¹ Pa Chaueneëgü i Corĭtiucūāx, dücax aixcüma pemaã nūxū tixu rü guxü i torü maxünemaã pexü tangechaügüxüchi.

¹² Rū toma rü tama pexü taxoe, natürü pema waxi nixĩ i tama petoxwèxexü.

¹³ Rū dücax, Pa Chaueneëgüx, rü ñoma wüxi i papá naxãcügüxü cèèxüxürüü pexü chacèèxü na choxü pengechaügüxüçèx ngēma choma pexü changechaüxürüü.

Tupana ya maxücüpata tixīgü

¹⁴ ¡Rü tãütáma namaã pexãmücü i ngēma duūxügü i tama yaxögüxü! Erü ngēxguma chi ngēmaãcü penaxüxgu rü tãütáma guxã wüxigu perüxĩnüë. ¿Rü ñuxãcü nawüxiguxü i ngēma mexü namaã i ngēma chixexü? ¿Rü ñuxãcü nawüxigu i ngónexü namaã i ëãnexü?

15 ¿Rü ñuxãcû nawüxiguxü ya Cristu namaã i Chataná? ¿Rü ñuxãcû nawüxiguxü i wüxi i duüxü i yaxõxü namaã i wüxi i duüxü i tama yaxõxü?

16 ¿Rü ñuxãcû Tupanapatawa nangëxmaxü i tupanetachicünèxãgü? Èrü yixema rü Tupana ya maxücüpata tixïgü, rü tawa namaxü i nümax. Rü Tupana rü pechïga nidexa ga yexguma ñaxgu: “Rü ngëma duüxügüwa tá chamaxü, rü natanügu tá chayarüxüxü. Rü norü Tupana tá chixï, rü nümagü rü tá chorü duüxügü nixïgü”,

ñaxgu.

17 Rü yemacèx ñanagürü ta ga tórü Cori:

“¿Rü ípechoxü i natanüwa i ngëma duüxügü i tama chorü duüxügü ixïgüxü! ¿Rü täxü i nüxü pingõgüxü i ngëma chopëxewa chixexü! Rü choma rü tá pexü chayaxu.

18 Rü choma rü Penatü tá chixï, rü pemagü rü tá chaunegü rü chauxacügü pixïgü”, ñanagürü ya tórü Cori ya Tupana ya guxüãrü yexera poraxüchicü.

7

1 Rü dücax, Pa Chaueneëgü ya Pexü Changechaügüxex, rü ngëma Tupanaãrü unetagü i pemaã nüxü chixuxü, rü taxcèx nixïgü. Rü ngëmacèx tanaxwëxe na yigüna idaugüxü na tama taxünemaã rü ëxna taãemaã naxüxcèx i ngëma Tupanapëxewa tama mexü. Rü tanaxwëxe i aixcüma Tupanaxü imuëãcüma nüxna yigü taxãgü rü naxcëxicatama tamaxë.

Pauru rü ngema Corïtiucüãxgümaã nataãxë

2 Rü tanaxwëxe i toxü pengechaügü. Rü dücax ga toma rü taxúxemaãma chixexü taxügü. Rü

taxúxexŭma chixexŭgu tanguxēē. Rŭ taxúxexŭma tawomŭxēēgŭ.

³ Rŭ tama pexŭ chixuxŭcèx nixī i pemaã nŭxŭ chixuxŭ i ngēma. Yerŭ marŭ pemaã nŭxŭ chixu na ñuxãcŭ guxŭ ga chorŭ maxŭmaã pexŭ changechaŭxŭ. Rŭ ngema pexŭ na changechaŭxŭgagu rŭ íchamemare na petanŭwa chamaxŭxŭ rŭ éxna wŭxigu pemaã chayuxŭ.

⁴ Rŭ ñuxma rŭ taxucèxma pexŭ chaxãneãcŭma pemaã chidexa erŭ poraãcŭ pemaã chataãē. Rŭ woo ngúxŭ na tingegŭxŭ, natŭrŭ aixcŭma choxŭ penangŭchaŭxēē rŭ choxŭ petaãēxēē.

⁵ Rŭ yexguma Machedóniããnewa tan-gugŭgucŭrŭwa rŭ taguma itarŭngŭgŭ. Yerŭ guxŭwama ga ngexta ítaxīxŭwa rŭ nŭxŭ itayangau ga guxchaxŭgŭ. Rŭ duŭxŭgŭ rŭ toxŭ nanaguxchaxēē na tanaxŭxŭ i Tupanaarŭ puracŭ rŭ yemacèx poraãcŭ taxoegaãxēgŭ..

⁶ Natŭrŭ ya Tupana ya tŭxŭ taãēxēēcŭ ya yíxema ngechaŭgŭxe, rŭ toxŭ rŭ ta nataãēxēē ga yexguma toxŭtawa nanguxgu ga taeneē ga Titu.

⁷ Rŭ tama yema toxŭtawa na nan-guxŭcèxicatama tataãēgŭ, natŭrŭ tataãēgŭ ta yerŭ ga pema rŭ poraãcŭ nŭxŭ penangŭchaŭxēē rŭ penataãēxēē ga guma taeneē ga Titu. Rŭ nŭma ga Titu rŭ tomaã nŭxŭ nixu na ñuxãcŭ poraãcŭ penaxwèxexŭ na toxŭ pedauxŭ. Rŭ tomaã nŭxŭ nixu na ñuxãcŭ naxcèx pengechaŭgŭxŭ ga yema chomaã pexŭxŭ, rŭ na ñuxãcŭ chauxcèx pexoegaãēgŭxŭ. Rŭ guxŭma ga yema oremaã rŭ yexeraãcŭ chataãē.

⁸ Choma nŭxŭ chacuèx rŭ yema popera ga pexcèx chaxŭmatŭxŭ rŭ pexŭ nangechaŭgŭxēē,

natürü ñuxma rü marü tama naxcèx changechaũ na chanaxümatüxũ ga yema popera. Rü noxri rü yemáãcü naxcèx changechaũ ga yexguma nüxũ chacuèxgu ga na pexũ nangechaũgüxêẽxũ ga yema popera ga yexguma penayauxgu.

⁹ Natürü i ñuxma rü chataãẽ na pexcèx chanaxümatüxũ ga yema popera. Rü tama yema na pengechaũgüxücèx chataãẽ, natürü chataãẽ yerü yema perü ngechaũgagu Tupanana pecuèxãchie rü penaxüchicüü ga perü maxũ. Rü pema rü aixcüma Tupanana pecuèxãchieãcüma namaã peporae ga yema ngechaũ, rü yemaãcü taxuũma ga chixexũ pemaã taxü ga yexguma pexcèx tanaxümatügu ga yema popera.

¹⁰ Rü ngẽma ngechaũ i Tupana naxwèxexũãcüma namaã iporaexũ, rü name nixĩ, erü ngẽma ngechaũgagu naxüchicüü i tórü maxũ rü ngẽmagagu tanayaxu i maxũ i taguma gúxũ. Rü ngẽmacèx taxucèxma naxcèx pixãũãchie i ngẽma ngechaũ. Natürü ngẽma ngechaũ i ñoma i naãnecũãx i duũxügü nüxũ ngẽxmaxũ rü taxuwama name erü yuwa nanaga.

¹¹ Rü yexguma yema poperamaã pexũ changechaũxêẽgu, rü Tupana naxwèxexũãcüma nixĩ ga namaã peporaexũ ga yema ngechaũ. ¡Rü dücax i ñuxma i tacü Tupana pemaã üxũ i ngẽma perü ngechaũgagu! Yerü yema perü ngechaũgagu rü aixcüma nagu perüxĩnũẽ ga yema chixexũ ga petanüwa üpetüxũ, rü meãma chomaã nüxũ pixu ga yema. Rü yema perü ngechaũgagu rü peãẽwa nangux ga yema chixexũ, rü poraãcü Tupanaxũ pemuũẽ. Rü yemacèx penaxwèxe na yema chaxũxũ na pexũ chayarüngüxêẽxücèx

yerü penamexēēgüchaũ ga yema chixexũ. Rũ yema perü ngechaũgagu rũ aixcũma penaxucuxē ga yema duũxũ ga chixexũ üxũ. Rũ guxũ ga yemawa rũ ipenawēx na tama pegagu yĩxũ ga yema chixexũ ga ngupetüxũ.

¹² Rũ yemacèx, yexguma pexcèx chanaxümatügu ga yema popera, rũ tama yema duũxũ ga chixexũ üxũgu charüxĩnüácũma chanaxümatü, rũ tama yema duũxũ ga namaã chixexũ naxüxũgu charüxĩnüácũma chanaxümatü. Natürü chanaxümatü ga yema popera na yemawa Tupanapēxewa nüxna pecuèxãchiexũcèx na ñuxãcü aixcũma toxũ pengechaũgüxũ.

¹³ Rũ yema na toxũ pengechaũgüxũ, rũ wüxi ga taãē nixĩ ga toxcèx. Natürü yema taãēärü yexera nixĩ ga yema taãē ga toxũ yexmaxũ ga yexguma nüxũ tadèuxgu ga Titu ga ñuxãcü taxũ ga taãē petanüwa na nayaxuxũ. Rũ aixcũma guxãma ga pema nixĩ ga wenaxârü poraãcü nüxũ penangüchaũxēēxũ.

¹⁴ Rũ noxri tauta yéma naxũxgu ga Titu, rũ namaã nüxũ chixu na mexũ i duũxũgü na pixĩgüxũ. Rũ ñuxma rũ taxucèxma chaxãne, erü guxũma ga yema Titumaã nüxũ chixuxũ ga pechiga rũ aixcũma ngēmaãcü nixĩ, yexgumarüũ na aixcũma yĩxũ ga guxũma ga yema Tupanaärü ore ga pemaã nüxũ tixuxũ.

¹⁵ Rũ ñuxma i Titu rũ yexeraãcü pexũ nangechaũ i ngēxguma nüxna nacuèxãchigu na ñuxãcü meã naga pexĩnüèxũ rũ ñuxãcü nüxũ pengechaũãcüma meã penayaxuxũ.

¹⁶ Rũ choma rũ ta poraãcü pemaã chataãèxũchi, erü nüxũ chacuèx na aixcũma peyanguxēēxũ ga

guxūma ga yema pemaã nüxū chixuxū.

8

Yema yaxōgūxū rū woo tama na namuārū dīeruāxgūxū, natūrū yema nüxū yexmacū ga dīerumaã meã togūxū narūngūxēēgū

¹ Rū ñuxmax, Pa Chaueneēgūx, rū pemaã nüxū tixuxchaū na ñuxācū Tupana namaã mecūmaxū i ngēma yaxōgūxū i Machedóniãāneārū iānegūwa ngēxmagūxū.

² Rū woo taxū ga guxchaxūgū nüxū na ūpetūgūxū, natūrū nataāēgūama. Rū woo tama na namuārū dīeruāxgūxū, natūrū yema nüxū yexmacū ga dīerumaã meã togūxū narūngūxēēgū.

³ Rū choma nüxū chadau rū pemaã nüxū chixu rū nūmagū rū taāēācūma ngīxū inaxāgū ga guxcūma ga dīeru ga nüxū tauxchacū na ngīxū inaxāgūxū. Rū ngīētū yemaārū yexera taāēācūma ngīxū inaxāgū.

⁴ Rū poraācū toxū nacèèxūgū na tama nūxna tanachuxuxūcèx na yemaācū yema togū ga taeneēgūxū nangūxēēgūxūcèx.

⁵ Rū yema nagu tarūxīnūēxūārū yexera ngīxū inaxāgū ga yema yaxōgūxū ga Machedóniãānecūāx. Yerū Tupananaxīra nūgū naxāgū rū yemawena toxna nūgū naxuaxūgū na toga naxīnūēxūcèx, yema Tupana naxwèxexūrū.

⁶ Rū yemacèx Tituxū tacèèxū na wena petanūwa naxūxūcèx na ngīxū pinguxēēxūcèx ga yema dīeru ga marū pemaã ngīxū inaxūgūcū na ngīxū penu-taquēxexū naxcèx i ngēma togū i taeneēgū i nüxū nataxuxū.

7 Pema rü guxūwama meã ipexī erü meã peyaxōgü, rü pexū natauxcha na meã nüxū pixuxū i Tupanaārü ore erü meã nüxū pecuèx na tacüchiga yīxū. Rü aixcūma togūxū perūngūxēēchaū, rü yema pexū tangúexēēxūācūma pegü pengechaūgü. Rü ñuxma rü ngēxgumarū ta penaxwèxe na aixcūma meã ipexīxū nawa i ngēma mexū i nacūma na dīeru ngīxū ipexāxū naxcèx i ngēma taeneēgü i nüxū nataxuxū.

8 Tama wūxi i mu nixī i ngēma pemaã nüxū chixuxū. Natürü chanaxwèxemare na nüxū pecuáxū na ñuxācü taāēācūma ngīxū inaxāgūxū ga togü ga yaxōgūxū. Rü pemaã nüxū chixu i ngēma na pema rü ta ngīxū ipexāgūxūcèx i ngēma dīeru i togü i taeneēgūarü ngūxēēcèx ixīcü, na ngēmaācü ipenawéxūcèx na aixcūma nüxū pengechaūgūxū.

9 Erü pema rü marü nüxū pecuèx na ñuxācü tamaã namecūmaxū ga tórü Cori ya Ngechuchu ya Cristu. Rü woo nüxū nayexma ga guxūma, natürü ñoma wūxi ga ngearü yemaxūāxūrū pexcèx nügü nixīxēē na ngēmaācü pexū nangēxmaxūcèx i muxūma i mexūgü.

10 Rü ñuxma rü perü mexūcèx nixī i pemaã nüxū chixuxū i ngēma dīeruarü nutaquēxechiga. Rü tauncü ga ngupetücūgutama nixī ga ipenaxūgūxū ga ngīxū na penutacquēxexū. Rü yema rü aixcūma perü ngūchaūmaã nixī ga penaxūxū.

11 Rü ñuxma rü yema noxri na meã ipenaxūgūxūrū, rü name nixī i taāēācūma rü perü ngūchaūmaã peyanguxēē rü ngēma dīeru i pexū ngēxmacūwa ngīxū ipexā naxcèx i ngēma peeneēgü i nüxū nataxuxū.

12 Erü ngēxguma aixcūma wūxi ya duūxē tūmaārū ngúchaūmaā ngēma dīeru i tūxū ngēxmèxcūwa tūmaēneēcèx ngīxū itaxāxgu, rü Tupana rü taāēācūma ngīxū nayaxu. Erü nūma ya Tupana rü taguma tūxna ngīxcèx naca i ngēma tūxū tauxcū.

13 Rū ngēmacèx tama chanaxwèxe i ngēma togūxū na perūngūxēēxūgagu pexū nataxu i pemax.

14 Natürü chanaxwèxe i guxāma tūxū nangēxma i tacū i tanaxwèxexū, erü tama name na texéaxū nataxuxū i tacū. Rū ñuxma na pexū nangēxmaxū i perū dīeru, rü name nixī i nūxū perūngūxēēgū i ngēma taeneēgū i nūxū nataxuxū. Rū ngürüāchi to i ngunexūgu i pema pexū natauxgu, rü nūmagū rü tá nūxī nūxū nangēxma na pexū nangūxēēgūxūcèx. Rū ngēmaācū tá guxātama tawūxigu.

15 Rū Tupanaārū ore i ūmatūxūwa rü ñanagürü: “Guxema muxūma tūxū yexmaxē rü taxuūma tūxū inayaxū. Rū guxema noxretama tūxū yexmaxē rü tama tūxū inayataxu”, ñanagürü.

Titu rü namücügüchiga

16 Natürü Tupanana moxē chaxā, erü nūma rü Tituxū nagu narūxīnūxēē na aixcūma pexū nangūxēēxūcèx, ngēma choma pegu charūxīnūxūrū.

17 Rū nūma ga Titu rü: “Ngū” ñanagürü na wena petanūwa chanamuxū. Yerü nūma rü woetama poraācū pegu narūxīnū. Rū ngēmacèx i ñuxma rü wena petanūwa naxū, erü nūxū nangúchaū.

18 Rū Titumaā ngēma tanamu i wūxi i taeneē i guxūma i yaxōgūxū nūxū ngechaūgūxū erü nūma

rū aīxcūma meã nūxū nīxū i Tupanaãrū ore i tūxū maxēxēxū.

¹⁹ Rū tama ngēmacèxicatama nīxī. Erū guxūma i ngēma yaxōgūxū rū ngēma taeneēxū naxunetagū na toxū íyaxūmūcūxūcèx rū toxū nangūxēēxūcèx i ngēxguma Yerucharéŭwa ngīxū tangexgu i ngēma dīēru, na ngēmaãcū nūxū ticuèxūūgūxūcèx ya tórū Cori, rū na guxāma nūxū dauxūcèx na ñuxācū taãēãcūma yīgū rüngūxēēgūxū.

²⁰ Rū ítayaga i ngēma taeneē, erū tama tanaxwèxe i texé toxū tīxū i yīxcama ngīxcèx i ngēma tacū i dīēru i taeneēgūcèx ngīxū inutaquēxegūcū.

²¹ Erū tama Tupanapēxewaxīcatama tanaxwèxe na meã tanaxūxū, natūrū guxū i duūxūgūpēxewa rū ta tanaxwèxe na meã tanaxūxū.

²² Rū Titumaã rū ngēma to i taeneēmaã petanūwa tanamu i wūxi i to i taeneē i toxū nūxū dauxēēxū na aīxcūma nūxū nangūchaŭ na naxūãxū i Tupanaãrū puracū. Rū ñuxma rū yexeraãcū petanūwa naxūxchaŭ i nūmax, erū nūxū nacuèx na ñuxācū pema rū taãēãcūma togūxū na perüngūxēēgūchaŭxū.

²³ Rū ngēxguma texé pexna caxgu na texe yīxū ya Titu, jrū tūmamaã nūxū pixu na nūma rū chomūcū ya wūxiwa chomaã pexcèx puracūcū na yīxū! Rū ngēma taxre i togū i namūcūgū, rū ngēma nīxī i yatūgū i guxūma i yaxōgūxū nūxū unetagūxū na Cristuarū puracū naxūgūxūcèx. Rū nūmagū rū aīxcūma norū maxūmaã Cristuxū nicuèxūūgū.

²⁴ Rū ngēmacèx chanaxwèxe i ngēma taeneēgūxū nūxū pedauxēē na aīxcūma nūxū pengechaūgūxū, na guxūma i yaxōgūxū nūxū cuèxgūxūcèx i

ngēmachiga. Rū ngēmaācū guxūma i ngēma yaxōgūxū tá nūxū nacuèxgū na aixcūma yīxū i ngēma mexū i ore i pechiga namaā nūxū tixuxū.

9

Yema dīeru ga yema togū ga yaxōgūxūcèx ngīxū inutaquēxecūchiga

¹ Rū taxucèxma tūxcūū pexcèx chanaxūmatū ngīchiga i ngēma dīeru i ngīxū penutaquēxegücü naxcèx i ngēma taeneēgū i yaxōgūxū i Yudéanewa ngēxmagūxū.

² Erū marū nūxū chacuèx rū perū ngúchaūmaā ipenaxā i ngēma dīeru. Rū guxūguma taāēācūma ngēma yaxōgūxū i Machedóniāānewa ngēxmagūxūmaā nūxū chixu na űuxācū i pema i Acayaanewa ngēxmagūxe rū naī ya taunecūgutama marū ípememarexū na ngīxū ipexāgūxū i ngēma dīeru. Rū yema rúmumaēxū ga yaxōgūxū ga Machedóniāānecūāx, rū yexguma nūxū naxīnūēgu na űuxācū taāēācūma togūcèx ngīxū na ipexāgūxū i perū dīeru, rū nūmagū rū ta inanaxūgū na ngīxū inaxāgūxū.

³ Natūrū i űuxma rū ngēma petanūwa chana-mugū i ngēma taeneēgū na nūxū nadaugūxūcèx, na aixcūma yīxū i ngēma nūxū chixuxū i pechiga. Rū chanaxwèxe na aixcūma ípememarexū na ngīxū ipexāxū i ngēma dīeru, ngēma taeneēgūmaā nūxū chixuxūrūū.

⁴ Erū ngēxguma chi űuxre i taeneēgū i Machedóniāānecūāx rū ngūrūāchi chomaā petanūwa naxīxgu, rū tama chanaxwèxe na pexū na iyangauxū na tama aixcūma ípememarexū na ngīxū ipexāxū i ngēma dīeru. Rū toxū rū chi wūxi

i ānexūchi nixī, erū marūchirēx namaā nūxū tixu na űuxācū aixcūma ípememarexū na ngīxū ipexāxū i ngēma dīeru. Rū maneca pexū rū chi ta wūxi i ānexūchi nixī.

⁵ Rū ngēmacèx nixī i chauxcèx namexū na naxcèx íchaçaxū i ngēma taeneēgū na nūxīra petanūwa naxīxūcèx rū nūmatama pexū yanangūxēēgūxūcèx na ngīxū penu-taquēxegūxūcèx i ngēma dīeru ga űpamama ngīxū pixucū. Rū ngēmaācū aixcūma tá ímemare i ngēma dīeru i ngēxguma ngēma changuxgu. Rū togū tá nūxū nadaugū na aixcūma perū ngūchaūmaā yīxū na ngīxū ipexāgūxū rū tama aūācūma na yīxū.

⁶ ¡Rū nūxna pecuèxāchie i ngēma dexa i űaxū:

“Rū yíxema noxretama i nanetūchire itoxe, rū noxretama i norū o tayaxu. Natūrū yíxema muxū i nanetūchire itoxe, rū muxūma i norū o tayaxu”,

űaxū!

⁷ Rū wūxichigū tanaxwèxe na ngīxū itaxāxū i ngēma ngīgu tarūxīnūcū na űuxre ngīxū itaxāxchaūxū. Rū tama name i aūācūma ngīxū itaxā rū ēxna texé tūxū muācūma ngīxū itaxā. Erū Tupana rū nūxū nangechaū i ngēma duūxū i taāēācūma ngīxū ixāxū.

⁸ Rū Tupanamēxēwa nangēxma na poraācū pexna naxāāxūcèx i guxūma i mexū i pexū taxuxū, na guxūguma pexū nangēxmaxūcèx i ngēma penaxwèxexū rū naētū na pexū íyaxūxūcèx na togūxū namaā perūngūxēēgūxūcèx.

⁹ Tupanaārū ore i űmatūxūwa rū űanagūrū:

“Yima yatū ya mecū rū norū ngūchaūmaā meā inanaxā nūxna i ngēma duūxūgū i taxuūma

nūxŭ ngēxmaxŭ. Rŭ Tupana rŭ tá guxŭgu
nŭxna nacuèxāchi na ñuxācü namecŭmaxŭ i
nŭmax”,

ñanagŭrŭ.

¹⁰ Tupana nixī ya tŭxna naxācü ya nanetŭchire na
inatoxŭcèx, rŭ tŭxna naxācü i ōna na nangōxŭcèx.
Rŭ nŭma tá nixī i pexna naxāāxŭ ya guxŭnema
ya nanetŭchire ya penaxwèxene na ipenatoxŭcèx.
Rŭ nŭma tá nanaxŭxēē rŭ nanayaxēē ya yima
nanetŭchire. Rŭ tá nanamuxēē i norŭ o, na
muxŭchixŭ nawa peyaxuxŭcèx na ngēmamaā
togŭxŭ perŭngŭxēēgŭxŭcèx.

¹¹ Rŭ ngēmaācü i pema rŭ tá pexŭ nangēxma
i guxŭma i mexŭ na tauxchaācüma nŭxŭ
perŭngŭxēēgŭxŭcèx i togŭ. Rŭ ngēxguma ngēma
togŭ i taeneēgŭxŭtawa ngīxŭ tangegŭgu i ngēma
dīeru i naxcèx ngīxŭ ipexācü, rŭ nŭmagŭ rŭ tá
poraācü Tupanana moxē naxāgŭ ngixcèx.

¹² Erŭ ngēxguma nŭxna ngīxŭ taxāxgu i ngēma
dīeru i nŭxŭ ngīmaā perŭngŭxēēgŭcü i ngēma
taeneēgŭ, rŭ tama tacŭ i nŭxŭ taxuxŭcèxicatama
ta nixī, natŭrŭ naetŭ i nŭmagŭ i taeneēgŭ rŭ perŭ
āmaregagu tá poraācü Tupanana moxē naxāgŭ.

¹³ Rŭ nŭmagŭ i ngēma taeneēgŭ rŭ tá Tupanaxŭ
nicuèxŭŭgŭ, erŭ ngēma perŭ āmaremaā tá nŭxŭ
nŭxŭ pedauxēē na aixcüma naga pexīnŭxŭ i
Cristuarŭ ore i mexŭ. Rŭ nŭmagŭ rŭ tá Tu-
panana moxē naxāgŭ naxcèx i ngēma perŭ āmare i
perŭ ngŭchaŭmaā nŭxna rŭ guxŭma i yaxōgŭxŭna
pexāgŭxŭ.

¹⁴ Rŭ ngēxgumarŭŭ i ngēma taeneēgŭ rŭ tá poraācü
pexcèx nayumŭxēgŭ, erŭ pexŭ nangechaŭgŭ. Rŭ
tá Tupanana moxē naxāgŭ naxcèx na ñuxācü

nūma ya Tupana poraãcū pexŭ nangŭxēẽxŭ na yemaãcū pexŭ natauxchaxŭcèx na nŭxŭ perŭngŭxēẽgŭxŭ.

¹⁵ Rŭ ngēmacèx i ñuxma rŭ Tupanana moxē taxā, yerŭ tŭxna nanamu ga Nane na tórŭ ãmare yīxŭcèx. Rŭ nataxuma i ore i nagu mexŭ na nŭxŭ ixuxŭcèx na ñuxãcū namaã itaãẽgŭxŭchixŭ i ngēma ãmare.

10

Pauruarŭ ore rŭ aixcūma nixī yerŭ Tupana nixī ga nŭxna āgacŭ

¹ Rŭ ñuxma rŭ yema Cristu yaxna tamaã naxīnŭxŭrŭrŭ rŭ tamaã namecūmaxŭrŭrŭ, rŭ choma rŭ ta pemaã yaxna chaxīnŭãcūma rŭ pemaã chamecūmaãcūma pexŭ chacèxŭ na chauga pexīnŭxŭcèx. Erŭ nŭmaxŭ i duŭxŭgŭ rŭ nŭxŭ nixugŭ na pexŭ chamuŭxŭ ega pexŭtawa changēxmagu natŭrŭ ngēxguma pexna chayaxŭgu rŭ tama pexŭ chamuŭ.

² Natŭrŭ ngēxguma ngēma petanŭwa chaxŭxgu, rŭ chierŭ natauxguma na tacŭcèx namaã chaporagaxŭ rŭ na chanaxucuxŭxŭ i ngēma duŭxŭgŭ i petanŭwa toxŭ ixuxŭ na ñoma tama yaxōgŭxŭrŭrŭ na tamaxŭxŭ. Erŭ choma rŭ íchamemare na namaãxŭchi na chidexaxŭ.

³ Rŭ aixcūma woo duŭxŭgŭ tixīgŭ natŭrŭ tama ñoma i naanecŭãxŭrŭxŭ togŭ tadai i ngexguma ítanapoxŭgu i Tupanaarŭ ore.

⁴⁻⁵ Erŭ ngēma toxne i namaã ítanapoxŭxŭ i Tupanaarŭ ore rŭ tama ñoma i naãnecŭãx namaã ãnxexŭ nixī. Erŭ toma rŭ toxŭ nangēxma i Tupanaarŭ pora na ngēmamaã itayanaxoxēẽxŭcèx i

Chatanáārū pora. Rū ngēmaācū itayanaxoxēē i guxūma i chixexū i ore i Tupanaxū namaā yaxugūgūxū i duūxūgū. Rū ngēmaācū itayanaxoxēē i guxūma i Tupanaārū uwanūgūarū ore i nūgū namaā yacuèxūūgūācūma duūxūgūmaā nūxū yaxugūgūxū na tama Tupanaāxū yaxōgūāxūcèx. Rū guxūma i tacū i nagu naxīnūēxū i ngēma duūxūgū i chixexū, rū Cristuna tanaxuaxū na nūma namaā inacuāxūcèx.

⁶ Rū wūxicana marū meā Cristuga pexīnūēgu, rū toma rū ítamemare na tūxū tapoxcuexū ya guxāma ya texé ya tama naga īnūēxē i Cristuarū ore.

⁷ Pema rū norū dūxétūxūnewaxicatama nixī i penangugūxū i wūxi i duūxū. Natūrū ngēxguma texé tūgū cuèxgu na Cristuarū duūxū tīxū, rū name nixī i nūxū tacuèx na toma rū ta tūmarū Cristuarū duūxūgū tixīgūxū.

⁸ Rū woo írarūwa chanangupetūxēē na chaugū chicuèxūūxū namaā i ngēma na Tupana toxū muxū, natūrū taxucèxma naxcèx chaxāne. Erū aixcūma Cori nixī ya toxū mucū na pexū tarūngūxēēgūxūcèx na yexeraācū meā peyaxōgūxūcèx. Rū tama tacū rū chixexūgu pexū na tayixēēxūcèx nixī i toxū namuxū.

⁹ Rū tama chanaxwèxe i nagu perūxīnūē na pexū íchabaixgūchaūxū namaā i ngēma poperagū i pexcèx chaxūmatūxū.

¹⁰ Erū nūmaxū i duūxūgū rū nūxū nixugū na chorū poperawaxicatama pexū íchabaixgūxū, natūrū chomaxūchi pexūtawa changexmagu rū tama aixcūma nūxū chacuèx na ñuācū mea chidexaxū na ngemaācū chauga pexū chaxīnūexēēxūcèx, ñaxūmaā choxū nixugūe.

11 Natürü texe ya ngemaãcü idexáxe rü tanaxwèxe i nagu tarüxnü rü ngēma pexna tayaxüguãcüma torü poperawa pemaã nüxü tixuxürüü tátama tixígü i ngēxguma petanüwa tangēxmagügu.

12 Toma rü tama tanaxwèxe i namaã togü tawüxiguxēē rü ēxna nagu togü tangugü i ngēma duüxügü i nügütama icuèxüügüxü. Nümagü rü nügütama nawomüxēēgü, erü nügümaã nügü nawüxiguxēē rü nügügutama nügü nangugü.

13 Natürü toma rü tama togü namaã tikuèxüügü i ngēma yaxōgüxü i tama Tupana toxmēxwa ngēxmagüxēēxü. Yerü Tupana nixĩ ga tomaã nüxü ixucü na ngextá nanaxwèxexü na tapuracüexü. Rü nüma nixĩ ga noxri Corĩtiuwa ga petanüwa toxü nangugüxēēxü na pemaã nüxü tixuxüçèx ga norü ore.

14 Rü yemaãcü toxira nixĩ ga noxri petanüwa tangugüxü na pemaã nüxü tixuxüçèx ga yema Cristuarü ore. Rü ngēmacèx i ñuxma na petanüwa taxĩxü, rü tama tanangupetüxēē ga yema Tupana tomaã nüxü ixuxü, yerü nüma nixĩ ga toxü namuxü na pexü tarüngüxēēgüxüçèx.

15 Rü ngemacèx tama togüarü puracümaãmare nixĩ i togü tikuèxüügüxü. Rü tama nüxü tachopetüchaü i ngēma Tupana tomaã nüxü ixuxü na pexü tangüxēēxü. Natürü ngema pexü tanaxwaexü nixĩ na yexeraãcü nüxü pecuáxü i Tupanaarü ore na ngemaãcü yexera peyaxōgüxüçèx.

16 Rü ngēxguma marü petanüwa tangugüguwena rü tanaxwèxe i ngēma duüxügü i perü yéamaxüra ngēxmagüxü i ngextá taguma texé nüxü íixuxüwa

taxĩ na ngẽmamaã rü ta nüxũ tixuxũcèx i ore i mexũ. Erü tama tanaxwèxe i togüarü puracümaã togü ticuèxüũgü.

¹⁷ Erü Tupanaãrü ore i ümatüxüwa rü ñanagürü: “Rü ngẽxguma texé tügü icuèxüũchaũgu, rü name nixĩ i tórü Corixũ ticuèxüũ, erü nüma nixĩ i tüxũ nangüxẽxũ”,

ñanagürü i ngẽma ore.

¹⁸ Erü ngẽma yatü i aixcüma Tupanapëxewa mexũ rü tama nügütama nicuèxüũ. Natürü ngẽma yatü i tórü Cori nüxũ icuèxüüxũ nixĩ i aixcüma Tupanapëxewa mexũ.

11

Pauru rü nüxũ nixuchiga ga yema orearü uruũgüneta ga tama Tupana imugüxũ

¹ Rü ñuxma i ngẽma tá pemaã nüxũ chixuxũ, rü bexmana pexcèx rü wüxi i ngẽãẽmare nixĩ, natürü chanaxwèxe i choxũ iperüxĩnüẽmare rü yaxna chomaã pexĩnüẽ.

² Erü Tupana pexũ inuxüxürüũ pexũ chinuxũ. Erü chaugagu nixĩ i Cristuaxũ peyaxõgüxũ, rü marü Cristuna pexũ chaxuaxũ na noxrüxicatama pixĩgüxũcèx. Rü ngẽmacèx chanaxwèxe i ngearü chixexüãẽ Cristuxũ pexũ chawëx ñoma wüxi i pacü i taguma yatüxũ cuèxcürüũ.

³ Natürü chaxoegaãẽ rü yema äxtape norü do-ramaã Ebaxũ na womüxẽẽxürüũ, ngürüãchi tá ta texé pexũ tawomüxẽẽ, na nüxũ perüxoexũcèx na Cristugu perüxĩnüẽxũ rü naxcèxicatama na pemaxëxũ.

⁴ Erü pema rü tauxchaãcü nixĩ na pexũ nawomüxẽẽgüxũ. Rü ngẽxguma ínangugügu

i duūxūgū i pemaã nüxū ixuxū i to i Ngechuchuchiga ya tama yima toma nüxū tixuchigacū, rü pema rü nüxū peyaxōgū i ngēma duūxūgū. Rü pema rü taãēācūma penayaxu i to i naãē i tama Tupanaãē i Ūñexū ga marū peyaxuxū ixīxū. Rü peyaxōgū i to i ore i tama Tupanaārū ore i mexū ga noxri peyaxuxū ixīxū.

⁵ Dücèx, rü woo nawe perūxīxgu i ngēma togū i orearū uruūgūneta, natürü chauxcèx rü taxuwama choxū narüyexeragū.

⁶ Rü woo tama choxū nangēxmagu i tauxcha na duūxūgūpēxewa chidexaxū, natürü aixcūma meã nüxū chacuèx i ngēma nachiga chidexaxū. Rü ngēma rü guxūma i torū puracūwa marū pexū nüxū tadauxēē i guxūguma.

⁷ ¿Pexcèx rü chixexū pemaã chaxū ga yexguma chaugū ícharūxíragu na pexū chataxēēxūcèx rü choxmēxmaã chapuracūgu na ngetanūācūma pemaã nüxū chixuxū ga Tupanaārū ore i tūxū maxēxēēxū?

⁸ Rü aixcūma yema togū ga yaxōgūxū choxna ngīxū āgücū ga dīēru ngīxū chayaxu na yemamaã petanūwa chapuracūxūcèx rü pexū charūngūxēēxūcèx.

⁹ Rü yexguma petanūwa chayexmagu rü aixcūma choxū itaxu ga dīēru, natürü taguma texéna ngīxcèx chaca. Rü taeneēgū ga Machedóniãñewa ne īxū rü choxna ngīxū naxāgū ga yema choxū tauxcū. Rü yemaācū tama pexūtawa ngīxcèx íchaca ga yexguma. Rü ñuxma rü ta tagutáma řacūcèx pexna chaca.

¹⁰ Rü Cristu ya chowa ngexmacūégagu pemaã nüxū chixu i ngema na aixcūma ngetanūācūma

petanūwa chapuracūxū. Rū ngema rū chorū taāxē nixī. Rū taxucūrūwa texe i guxū i Acáyaanewa choxna tanayaxu i ngema taāxē.

11 ¿Rū tacúcèx yīxū i ngēmaācū chidexaxū? ¿Éxna pexcèx rū tama pexū changechaūxúcèx yīxū i ngēmaācū chidexaxū? Dúcèx, pemaā nūxū chixu rū Tupana nūxū nacuèx na ñuxācū aixcūma pexū changechaūxū.

12 Natürū ngēma na ngetanūācūma pemaā nūxū chixuxū i ngēma ore, rū ngēmaācū tá chanaxüecha na taxucūrūwa chixri chauchiga yadexagūxúcèx i ngēma togū i orearū uruūgūneta i nūgū ixuxū na toxrū naxūgūāxū i Tupanaārū puracū.

13 Nūmagū rū aixcūma orearū uruūgūneta nixīgū, rū duūxūgūxū nawomūxēēgū. Rū nūmagū rū togu nūgū nicuxgū, rū nūgū nixugū na Cristu yamugūxū.

14 Rū ngēma rū taxucèxma namaā peḃaixāchiāēgū. Erū woo i Chataná rū ta rū Tupanaārū orearū ngeruūgū i daxūcūāx i yauracūxūrūācū nūgū nangoxēē.

15 Rū ngēmacèx woetama ngēmaācū nixīgū i ngēma duūxūgū i Chatanáāxū puracūexū. Rū nūmagū rū duūxūgū i mexū ūgūxūgu nūgū nicuxgū. Natürū ngēma ngēmaācū ixīgūxū, rū Tupana tá nanapoxcue naxcèx i ngēma chixexū i naxūgūxū.

Pauru rū yema puracū ga Ngechuchu nawa namuxūwa ngūxū ninge

16 Rū wena pemaā nūxū chixu rū tama chanaxwèxe i nagu perūxīnūē na wūxi i āñāēxū chīxū. Natürū ngēxguma chi ngēmaācū chomaā

nagu perūxīnūēgu, rü tama chanaxwèxe i choxna penachuxu na ñoma wüxi i ãũãëxürüũ chaugüétüwa chidexaxũ, na ngẽmaãcü choma rü ta írarüwa chaugütama chicuèxüüxücèx.

17 Rü ñuxma na chaugüétüwa chidexaxũ rü ngẽma rü tama tórü Coriarü mu nixĩ. Natürü ñoma wüxi i ãũãëxü nügü icuèxüüxürüũ nixĩ i chidexaxũ.

18 Rü ñuxma na nangẽxmaxũ i muxüchixũ i duüxügü i ñoma i naãnewa nügü icuèxüügüxũ, rü choma rü tá ta írarüwa chaugü chicuèxüũ.

19 Pema rü nagu perūxīnūē rü nüxũ cuèxüchigüxũ pixīgü. Natürü taãëãcüma yaxna namaã pexīnūē i ngẽma duüxügü i tama naãëxũ icuáxũ.

20 Rü yaxna namaã pexīnūē i ngẽma duüxügü i nügüxũ pexũ puracüexëëxũ, rü ngẽma ngetanüãcüma pexũ puracüexëëmarexũ, rü ngẽma pexũ womüxëëgüxũ, rü ngẽma chixri pexũ yaxgüxũ, rü ngẽma pemaã guxchigagüxũ.

21 Rü woo wüxi i ãnexüchi nixĩ na pemaã nüxũ chixuxũ, natürü chauxcèx rü tama aixcüma pexũ nüxũ tadauxëë ga torü pora ga yexguma petanüwa tayexmagügu. Natürü ñuxma na tama namuëëxũ na nügü yacuèxüügüxũ i ngẽma togü i duüxügü, rü choma rü ta taxucèxma chamuũ na chaugüétüwa chidexaxũ woo pexcèx rü taxuwama namexgu i ngẽma nüxũ chixuxũ.

22 Nümagü rü nügü yaxugügu rü Yudíugü nixīgü. Natürü choma rü ta Yudíu chixĩ. Rü nümagü nügü yaxugügu rü Iraétanüxügü nixīgü. Natürü choma rü ta rü Iraétanüxũ chixĩ. Rü nümagü rü nügü yaxugügu rü Abráütanüxũ nixīgü. Natürü choma

rū ta Abráūtanūxū chixī.

²³ Nūmagū rū nūgū yaxugūgu rū Cristuaxū napuracūe. Natūrū choma rū norū yexera Cristuaxū chapuracū. Rū ngēma ñachagūrū pexū woo pema nagu perūxīnūēgu na ñoma wūxi i āūāēxūrūū chidexaxū. Rū ngēma duūxūgūarū yexera poraācū Tupanaāxū chapuracū. Rū norū yexera chapoxcu, rū norū yexera choxū naçuaixgū ga duūxūgū. Rū muēxpūxcūna rū āūcūmaxūchixūwa chayexma rū wixguxūchi taēx choxū nimèxgū.

²⁴ Rū 5 ēxpūxcūna nixī ga 39 ga çuaximaā choxū napoxcu-gūxū ga chautanūxūgū ga Yudíugū.

²⁵ Rū tomaēxpūxcūna nixī ga naīmaā choxū naçuaixgūxū, rū wūxicana ga nutamaā choxū inamuxūchigūxū. Rū tomaēxpūxcūna nixī ga guma wapuru ga nagu chixūxūne rū chomaā inan-guxū. Rū wūxicana ga yexguma chomaā inan-guxgu ga wapuru rū wūxi ga chūtaxū rū wūxi ga ngunexū chinge na taxū ga taxtūarū ngāxūtūgu mūrapewaétūgu chatunagūācūma chiwēxēxū.

²⁶ Rū poraācū nu ne chanaxū, rū poraācū āūcūmaxūwa chayexma yerū natūgū ga āūcūmaxūgu chixūgū, rū ngīteèxgūxū rū chixexū chomaā naxūgūchaū. Rū woo chautanūxūgū ga Yudíugūtanūwa, rū woo yema duūxūgū ga tama Yudíugū ixīgūxūtanūwa, rū woo īānegūwa, rū woo namagūwa, rū woo taxtū i taxūwa rū āūcūmaxūwa chayexma. Rū yema duūxūgū ga chomūcūgūneta ixīgūxūtanūwa rū ta āūcūmaxūwa chayexma.

²⁷ Rū poraācū chataarū puracūāx, rū muxūchixū ga guxchaxūgū choxū nangupetū. Rū muēxpūxcūna rū tama chape, rū chataiya, rū chītawa. Rū muēxpūxcūna rū tama chachibū, rū

choxŭ nanadeyu, rŭ choxŭ nataxu ga chauxchiru.

²⁸ Rŭ naetŭwa i guxŭma i ngēma, rŭ guxŭ i ngunexŭgu rŭ chaxoegaāē naxcēx i guxŭma i ngēma yaxōgŭxŭ i guxŭ i ĩānewa ngēmagŭxŭ.

²⁹ Rŭ ngēxguma chi texé tama poragu, rŭ choxŭ rŭ ta nangŭx. Rŭ ngēxguma chi wŭxie texéxŭ pecadugu nguxēēgu, rŭ chauāēwa nangŭx i ngēma.

³⁰ Natŭrŭ ngēxguma chi chaugŭ chicuèxŭŭchaŭgu, rŭ tá chaugŭ chicuèxŭŭ naxcēx na duŭxŭgŭ choxŭ dauxŭ na taxuwama chamexŭ.

³¹ Rŭ Tupana ya tórŭ Cori ya Ngechuchu ya Cristunatŭ ya mecŭ na guxŭguma nŭxŭ icuèxŭŭgŭxŭ, rŭ nŭxŭ nacuèx na aixcŭma yŭŭxŭ i ngēma nŭxŭ chixuxŭ.

³² Rŭ yexguma Damacuwa chayexmagu, rŭ guma ĩāneārŭ āēxgacŭ ga Aretaarŭ ngŭxēēruŭ, rŭ norŭ churaragŭxŭ namu na nŭxna nadaugŭxŭcèx ga guma ĩāneārŭ poxeguxŭārŭ ĩāxgŭ na choxŭ yayauxgŭxŭcèx ga yexguma chi yéma íchaxŭŭxgu.

³³ Natŭrŭ yema ĩāneārŭ poxeguxŭārŭ ĩāxácŭwa rŭ wŭxi ga pexchigu choxŭ ĩnarŭçhŭxŭetaŭgŭ ga chomŭcŭgŭ. Rŭ yemaácŭ chiña naxchaxwa ga yema āēxgacŭ.

12

Tórŭ Cori rŭ Pauruxŭ nangoxetŭxēē rŭ nŭxŭ nŭxŭ nacuèxēē ga ŭacŭ ga ēxŭguxŭ

¹ Taxuwama name na texé tŭgŭ icuèxŭŭxŭ. Natŭrŭ tá pemaā nŭxŭ chixuama na ñuxácŭ tórŭ Cori choxŭ nangoxetŭxēēxŭ rŭ ñuxácŭ choxŭ nŭxŭ na nacuèxēēxŭ ga ŭacŭ ga ēxŭguxŭ.

² Rû 14 ga taunecü marü nangupetü ga na Tupana daxüguxü ga naãnewa ga nüma Ínayexmaxüwa choxü nagaxü. Natürü tama nüxü chacuèx rü chauãewaxicatama nixi ga yéma choxü nagaxü, rü êxna guxü ga chaxunemaã yiixü ga yéma choxü nagaxü. Rû Tupanaxĩcatama nüxü nacuèx i ngẽma.

³⁻⁴ Rû aixcüma meãma nüxü chacuèx na daxüguxü ga naãnewa choxü nagaxü ga Tupana, natürü tama nüxü chacuèx rü guxü ga chaxunemaã yéma choxü naga rü êxna tama. Rû Tupanaxĩcatama nixi ya nüxü cuácü i ngẽma. Rû yéma nüxü chaxĩnü ga ore ga êxüguxü i guxüma i duixügüna chuxuxü na nüxü yaxugüxü.

⁵ Rû choma rü chi name na chaugü naxcèx chicuèxüüxü i ngẽma, natürü tãütáma ngẽmaãcü chanaxü. Erü ngẽma ngúxü na chingexümaãxĩcatama tá nixi i chaugü chicuèxüüxü.

⁶ Natürü ngëxguma chi chaugü chicuèxüüchaügu, rü tãü chima wüxi i ngẽãẽmare nixi i ngẽma, erü aixcüma nixi i ngẽma ore i nüxü chixuxü i chauchiga. Natürü tama chaugü chicuèxüü na taxúema naga rüxĩnüxüçèx na ngẽma chowa nüxü naxĩnüèxü rü nüxü nadaugüxüãrü yexera chiixü.

⁷ Natürü tórü Cori rü tama nanaxwèxe i poraãcüxüchima chaugü namaã chicuèxüüxü ga yema êxüguxü ga mexèchixü ga choxü nüxü nacuèxèèxü. Rû yemacèx chaxunewa nananguxèè ga wüxi ga choxü ngúxü ñoma wüxi ya tuxu chaxunewa ingaxixürüü. Rû yema rü ñoma wüxi ga Chatanáãrü orearü ngeruürüü chauxütawa nangu na choxü nachixewexüçèx na

tama chaugü chicuèxüüxücèx.

⁸ Rū tomaèxpüxcüna tórü Corina chaca na choxü iyanaxoxèèãxücèx ga yema choxü ngúxü.

⁹ Natürü nūma ya tórü Cori rü ñanagürü choxü:

“Rū cuma nūxü cucuèx na guxüguma cuxü changechaü, rü ngëxīcatama nixī i cunaxwèxexü. Rū ngēma duüxügü i tama poraexüwa nixī i aixcüma chanangoxèèxü i ñuxäcü na chaporaxü”, ñanagürü choxü. Rū ngēmacèx chataãe ega tama chaporagu. Erü ngëxguma tama chaporagu rü ngëxguma nixī i chowa inawéãxü i norü pora ya Cristu.

¹⁰ Rū ngēma na Cristuxü na changechaüxügagu nixī i yaxna namaã chaxīnūxü ega woo chaturagu rü woo tacü chomaã yaxugüegu i duüxügü. Rū woo choxü natauxgu i chorü ngēmaxügü, rü woo duüxügü rü chowe yangëxütanügu, rü woo guxchaxügü choxü ngëxmagu rü Cristucèx rü yaxna namaã chaxīnü i guxüma i ngēma. Erü ngëxguma chaturagu, rü ngëxguma nixī i yexeraäcü Cristu choxü poraxèèxü.

Pauru rü naxcèx naxoegaãe ga yema yaxögüxü ga Corītiuwa yexmagüxü

¹¹ Maneca ñoma wüxi i ãüãèxürüü chidexa, erü ngēmaäcü chaugü chicuèxüü. Natürü pegagutama nixī i düxwa ngēmaäcü chaugüétüwa chidexaxü, yerü pema chi nixī ga choxü picuèxüügüxü, rü tama i chomax. Rū woo taxuwama chame i chomax, natürü taxuwama choxü narüyexeragü i ngēma orearü uruügüneta i nawe perüxīxü.

¹² Rū yexguma petanüwa chayexmagu, rü yaxna pemaã chaxīnüäcüma pexü nūxü chadauxèe na aixcüma Cristu choxü muxü na nūxü chixuxücèx

ga norū ore. Rū cuèxruŭgūmaã pexŭ nüxŭ chacuèxēē ga yema. Rū pexŭ nüxŭ chadauxēē ga taxŭ ga mexŭgü ga Tupanaãrū poramaã üxŭ.

13 Rū yexguma petanüwa chayexmagu rü pemaã chamecūma yema guxŭma ga togü ga yaxōgüxŭmaã na chamecūmaxŭrūütama. Natürü wüxiwaxicatama nixī ga íchatüxŭ yerü ga petanüwa rü tama ngīxŭ chayaxu ga dīeru yema togü ga yaxōgüxŭtanüwa ngīxŭ chayaxuxŭrūü. Rū chanaxwèxe i choxŭ nüxŭ pengechaŭ i ngēma.

14 Rū ñuxma rü marü íchamemare na norü tomaēxpŭxcūna pexŭ íchayadauxŭ. Rū tãütáma űacücèx pexna chayaca. Erü tama perü ngēmaxŭgücèx petanüwa chaxŭ, natürü pexcèxüchi nixī i ngēma chaxŭxŭ. Pema rü chauxacügü pixīgü i Tupanaãrū orewa. Rū ngēma papá rü mamáãrū puracü nixī na naxãcügüna naxããxŭ i ngēma nüxŭ taxuxŭ. Rū tama naxãcügüarü puracü nixī na nanatüna rü naēna naxãgüãxŭ.

15 Rū choma rü íchamemare na chorü ngúchaŭmaã pexcèx ichanaxãxŭ i guxŭma i űacü i choxŭ ngēxmaxŭ rü woo chaugütama rü ta na ichaxãxŭ na aixcūma meã peyaxōgüxŭcèx. Natürü chauxcèx rü ngēxguma yexeraãcü pexŭ changechaŭgu, rü pema rü yexeraãcü nüxŭ perüxoetanü na choxŭ pengechaŭxŭ.

16 Rū nümaxŭ i duŭxŭgü i petanüwa, rü woo nüxŭ nacuèxgü na taguma űacücèx pexŭtawa íchaçaxŭ, natürü nümagü rü nüxŭ nixugüama na pexŭ chawomüxēēãcüma perü dīeru ngīxŭ chayaxuxŭ.

17 ¿Éxna pema nagu perüxĩnŭēgu rü yema

duūxūgū ga petanūwa chamugūxūwa pexū chawomūxēē?

18 Rū Titumaã nūxū chixu na petanūwa íyadauxūcèx. Rū namaã yéma chanamu ga yema to ga taeneē. ¿Éxna pema nagu perūxīnūēgu ga Titu rū pexū yéma nayawomūxēē? ¿Tama éxna aixcūma yīxū na chauxrūū meã na namaxūxū rū chauxrūū mexūgu naxīnūxū ga Titux?

19 Bexmana pema tá nagu perūxīnūē rū ngēmaācū tidexagū, erū togūétūwatama tachogūchaū. Natūrū, Pa Chaueneēgū ya Pexū Tangechaūgūex, rū Tupanapēxewa rū Cristuégagu nixī i tidexagūxū na yexeraācū meã Tupanaāxū peyaxōgūxūcèx rū yexeraācū meã na pemaxēxūcèx.

20 Erū chaxoegaãē rū ngēxguma wena pexū íchayadēuxgu, rū ngürūāchi tama choma chanaxwèxexūācūma ípemaxē, rū ngēmacèx i pema rū tāūtāma chomaã petaāēgū. Rū chaxoegaãē erū ngürūāchi tá pexū ichayangau na pegūchi ípexaiexū, rū pegūarū ngēmaxūcèx pixāūxāchigūxū, rū pegūmaã penuēxū, rū pegūguxicatama íperūxīnūēxū, rū pexoregütèèxgūxū, rū toguāxū pixuxū, rū pegū picuèxūūgūxū, rū chixexū ípexūexū rū ngēmaācū chixri ípemaxēxū.

21 Rū chaxoegaãē rū ngēxguma wena petanūwa chaxūxgu, rū ngürūāchi Tupana rū pegagu tá choxū naxānexēē. Rū ngürūāchi ngechaū tá choxna pexā, erū muxēma i petanūwa rū marū ñuxgumama pecadu taxūgūecha, rū tama nūxū tarūxoechaū na Tupanapēxewa chixexū taxūgūxū rū naī i ngemaāmare na tamaxēxū rū guxūma i

togü i chixexŭ na taxügüxŭ.

13

Pauru nayaxucuxē ga yema yaxōgüxŭ ga Corītiucūāx rü ñuxŭchi nüxŭ narūmoxē

¹ Ñuxma rü norü tomaēxpüxcüna tá nixĩ na petanüwa chaxŭxŭ. Rü Tupanaärü ore rü tamaã nüxŭ nixu rü ngēxguma texé chixexŭ üxgu rü taxre rü ěxna tomaēxpüx i duŭxŭgü nüxŭ daugügu rü nüxŭ yaxugügu na aixcüma yĩxŭ, rü aixcüma tá poxcu tümamaã taxuegu ya yixema chixexŭ üxe.

² Rü ngēmacèx i pema i ũpamamatama pecadu ügüechaxe rü guxāma i pema ya chixri maxēxē, rü ñuxma na woo pexna chayaxŭguxŭ rü wenaxārü pexna nüxŭ chacuèxāchixēē rü ngēxguma tá ngēma chaxŭxgu rü aixcüma tá chanamexēē i guxŭma i ngēma chixexŭ i petanüwa ngēxmaxŭ, rü tāūtāma chanangupetüxēēmare i ngēma.

³ Rü pema na naxcèx iperüdaunüxŭ na Cristu chowa idexaxŭ, rü ngēxguma ngēma chaxŭxgu, rü ngēxguma tá nixĩ i nüxŭ pedauxŭ na aixcüma chowa na yadexaxŭ ya Cristu. Rü nüma ya Cristu rü chowa tá pexŭ nüxŭ nadauxēē na tama natüraxŭ natürü aixcüma yanguxēēāxŭ i norü ore rü tüxŭ napoxcuexŭ ya yixema chixexŭ ügüxe.

⁴ Rü aixcüma nixĩ ga Cristu ga ñoma wüxi ga duŭxŭ i turaxŭrŭü nügü yaxixēēxŭ ga yexguma curuchawa yapotagu. Natürü i ñuxma rü Tupanaärü poragagu namaxŭ. Rü ngēxgumarüŭ i toma na norü duŭxŭgü tixigüxŭ, rü taturae i toxonewa. Natürü ngēma na norü duŭxŭgü

tixīgūxū, rü Tupanaârü poragagu tá tamaxē na pexū tarüngūxēēgūxūcèx.

⁵ Rü name nixī i pegütama pengugü na nüxū pecuáxūcèx ngoxi aixcüma meã peyaxōgü. Rü name nixī i pegü pengugüarü maxūāx rü ngoxi Tupanapēxewa pime. ¿Tama ēxna nüxna pecuèxāchie na Ngechuchu ya Cristu rü pewa nangēxmaxū ega aixcüma peyaxōgügu?

⁶ Rü chierüna nüxū pecuèxgu na toma rü tama orearü uruūgūnetamare na tixīgūxū.

⁷ Rü Tupanana naxcèx taca na taxuūma i chixexū na pexügūxūcèx. Rü tama duūxūgūpēxewa togü ítarūtagūxūcèx nixī na ngēmaācü tayumūxēgūxū. Natürü Tupanana naxcèx taca i ngēma na aixcüma meã naxcèx pemaxēxūcèx woo duūxūgü nagu rüxīnūēgu na toma rü ítatüemarexū.

⁸ Toma rü taxucürüwama chixri nachiga tidex-agü i Tupanaârü ore i aixcüma ixīxū, erü toma rü naētüwa tachogü i ngēma ore.

⁹ Rü tá tataāēgü ega aixcüma peporaegu i perü maxūwa rü ngēmacèx natauxgu i tacücèx pemaã na taporagaexū. Rü Tupanana tá naxcèx tacaama na pexū naporaexēēxūcèx i perü maxūwa na düxwa aixcüma mexū i norü duūxūgü na pixīgūxūcèx.

¹⁰ Rü naxūpa na pexū na íchayadauxū nixī i pexcèx chanaxūmatūxū i ñaã popera, na ngēxguma ngēma changuxgu rü nataxuxūcèx i tacücèx pemaã na chaporagaxū. Erü tórü Cori choxū namu na pexū charüngūxēēxūcèx na yexeraācü meã peyaxōgūxūcèx, rü tama chixexū pemaã na chaxūxūcèx nixī i choxū namuxū.

11 Rū ñuxma na ichayacuèxēēxŭ i ñaã popera, Pa Chaueneēgŭx, rŭ chanaxwèxe i meã pexŭ naxŭpetŭ rŭ naxcèx pedau na ñuxãcŭ aixcŭma meã Tupanacèx pemaxēxŭ. Rŭ name nixĩ i pegŭ petaãēxēēgŭ rŭ wŭxigu perŭxĩnŭē rŭ meã yaxna pegŭmaã pexĩnŭē rŭ aixcŭma pegŭ pengechaŭgŭ. Rŭ nŭma ya Tupana ya tŭxŭ ngechaŭcŭ rŭ tŭxŭ rŭngŭxmŭēxēēcŭ, rŭ guxŭgutáma pemaã inarŭxãŭx.

12 Rŭ chanaxwèxe i wŭxichigŭ i pema rŭ pegŭ pengechaŭgŭãcŭma pegŭ perŭmoxēgŭ.

13 Rŭ guxŭma i togŭ i taeneēgŭ i yaxōgŭxŭ rŭ pexŭ narŭmoxēgŭ.

14 Rŭ ñuxma rŭ chanaxwèxe i tórŭ Cori ya Ngechuchu ya Cristu pexŭ narŭngŭxēē, rŭ Tanatŭ ya Tupana rŭ pexŭ nangechaŭ, rŭ Naã i Ūñexŭ rŭ guxŭguma pemaã inarŭxãŭx.

Rŭ nuãma pexna,
Pauru

**Tupanaarü Ore i Tóru Cori ya Ngechuchu ya
Cristuchiga
New Testament in Ticuna (PE:tca:Ticuna)**

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

9d5dc22a-30be-5d26-85a9-76047f4c89e6